

lis Gnovis

■ UDIN. Tornâ a partî de justizie

Martars ai 26 di Mai, su la pagjine «Facebook» dal Coordinament regionâl de clape cuintri des mafis, «Libera», a tornin i apontaments di riflessione e di confront «Liberalinforma». A 18, Francesca Rispoli dal Ufici di presidence e presenterà «#giustaitalia: un manifesto corale per ripartire insieme». Prin di jê, «Libera» Friûl e Triest e veve invidât a cjarar su «La lunga mano delle mafie ai tempi del Corona Virus» Davide Mattiello, president de fondazion «Benvenuti in Italia» (www.youtube.com/channel/UCSH900t_T hErmTaaUeyJhhw).

■ PESARIIS. Confront su la politiche forestâl

Ancje lis Comunitâts ch'a possedin boscs coletifs e i operadôrs dal setôr, in plui dai esperts e dai soestants, a son invidâts a condividi lis sôs osservazions su la gnove «Strategie forestâl italiana», ch'è je daûr a nassi. Fintremai ai 28 di Mai, il Ministeri des Politichis agriculis, mediant di un modul publicât su la rêt des rêts (www.politiche-agricole.it/flex/cm/pages/ServeBLOB.php/L/IT/IDPagina/15339), al tire dongje i resonaments e lis propuestis dai teritoris.

■ PUART. In bici tal Friûl concuardiês

Il Circul «Pascutto-Geretto» di «Legambiente», ch'al opere in ducj i Cumons dal Mandament di Puart (www.legambientevenetorientale.it), al è daûr a studiâ cemût svilupâ la mobilitât in dut il Venet orientâl e tal Friûl concuardiês sot Vignesie. In grazie de colaborazion dal proget «Ecco» (www.economicirculari.eu) e cul jutori dal Circul pe Legge diminuzion «Livence-Tiliment» (www.mdfilivenczagliamento.it/), al smire di ingaiâ ducj chei ch'a bramin di ridusi il trafic, incressint traspuarts sigûrs e sostignibîs par stradis percoribilis. Su la rêt, si cjate bielzà un cuisionari par chei che no intindin di «delegâur a di chei altris il mudament ch'a vuelin par ridusi l'incuinament ambientâl».

■ MONFALCON. «CantaFestival de la Bisiacaria»

Si varâ timp fintremai ai 18 di Setembar par cjapâ part a la XVII edizione dal «CantaFestival de la Bisiacaria» il concors par compositôrs di melodiis tradizionâls e di melodiis dal di di vuê ch'a doprin tes sôs cjantis il Bisiac. La Pro loco di Monfalcon e promôf l'iniziativa cul fin di «fâ vivi, valorizâ e slargjâ il dialet, la culture e la musiche bisiache, mediant des capacitâts creativas di scritôrs, di poetis, di compositôrs e di musiciscj». Si podarà concori cun dôs cjantis ineditis par autôr, in forme anonime. Il regolament dal premi si cjatilu su la pagjine «Facebook» o tal lûc internet de Pro loco (www.monfalcone.info).

■ SPILIMBERC. Indaûr a scuele i mosaiciscj

Ancje se la didatiche no si è mai fermade, in grazie des lezions «online», la «Scuele mosaiciscj dal Friûl» di cualchi di e à podût tornâ a inviâ ancje lis ativitâts praticis li dai siei laboratoris di Spilimberc. Profitant de ordenance 12 dai 3 di Mai, l'istitût artistic professionâl al è stabilît i criteris par garantî intune operativitât e sigurece pai trê cors dal percors professionâl e pal cors di perfezionament.

Joibe 21	S. Gjisele	Lunis 25	La Madone di Monsante
Vinars 22	S. Rite di Cassie	Martars 26	S. Filip Neri
Sabide 23	S. Desideri	Miercus 27	S. Ustin
Domenie 24	Sense dal Signôr	Il timp	A rivin temporâi.



Il soreli
Ai 21 al iève aes 5.28
e al va a mont aes 20.40.



La lune
Ai 22 Lune gnove.

Il proverbi
In câs di necessitât,
ancje il lóf al mangje moscjis.

Lis voris dal mês
Tignit nete la tiere gjavant vie lis malis jerbis
tant che la vraie e il papavar
prime che a sparnicin lis lôr semencis.

I artesans dal avignî

Propueste di «ASviS»
dopo dal «shock
sistemic» de pandemic

Te centtrentesimecuinte zornade dal an – ai 14 di Mai – l'Italie e à finît il so «Overshoot Day» pal 2020. Al ven a stâi ch'è je rivade la di che i Talians a àn finît di consumâ lis risorsis naturâls – aghe, tiere, aiar, legnam, animâi, pes, plantis, minerâi... – preparadis dal so teritori e dal Marimont par dute intere l'anade. Il calcul di chel ch'al è stât batiât «Impront ecologic de Umanitât» al è curât dal «Global Footprint Network», ch'al confronte ogni gjenar di dât e di cifre sui consums mondiâi di risorsis naturâls.

Dal sigûr, l'emergence sanitarie e à fat sbalâ i conts dal organism internazional par chest an cussî particulâr, ma al reste il fat dramatic che une Tiere sole e nancje dôs o trê no bastin par sostentâ l'Umanitât, se si continue a sfrutâl cussî. Ma se il Mont nol bastarâ pai Talians dal di di vuê, mancûl ancjemò al sarà ospitâl par chei des etis avignî. Esistial un rimiedi par chest fat dramatic? Il speli di seguî isal chel de Indonésie, ch'è finissarâ il so cjadalan ecologic ai 18 di Dicembar? O chel dal Ecuador, cul «Overshoot Day» ai 14 di Dicembar? O ben, la cuistion ise ancjemò plui grive e cence soluzions?

Cheî che no molin di sperâ e ch'a proponin soluzions e azions di praticâ a son lis clapis congregadis te Aleance pal svilup sostignibil «ASviS». Obleadis, par colpe di «Covid-19», a sprlungjâ il «Festival dal svilup sostignibil» tal mês di Setembar, in chescj dis a organizin trê iniziative «par ticiâ il dibatiment



Il Lunari cul «OvershootDay» si cjate a la direzion: www.overshootday.org/newsroom/country-overshoot-days/

A coventin
politichis
par potenziâ
la «resilience
trasformativa»
dal sisteme sociâl
e economic

su lis politicis di meti in vore par potenziâ la «resilience trasformativa» dal sisteme sociâl e economic e par indreçâ l'avignî viers la direzion segnade te Agjende 2030.

L'«Agjende 2030» al è il programe des Nazions Unidis ch'al stabilis i 17 obietifs di jonzi dentri dal 2030 par garantî sostignibilitât ambientâl, economiche e sociâl par ducj (<https://unric.org/it/agenda-2030/>).

«ASviS Live. Trê pas viers il Festival» al è il titul de iniziative, inmaneade cun «moments di partecipazion interative par saporâ il confront e par tirâ dongje propuestis». Lis convignis a saran inmaneadis «in direte streaming», cun invidâts cualificâts e cui quartevôs di impuartantis organizacions de zoventût, tal lûc internet festivalsvilupposostenibile.it e in chel de Aleance (asvis.it), in plui che sul cjanâl «Youtube» di «ASviS» e sul sit di «Ansa.it».

Il prin apontament al è stabilît ai 21 di Mai, cuant che si discorarà su «Orientâ lis sieltis, disegnar l'avignî». La crisi di chescj mês, cul so «shock sistemic», e à sclarit che no si salte fûr cence politicis ch'a cjalin lontan, stant ch'al è necessari savoltâ il sisteme sociâl e economic dal di di vuê (<https://festivalsvilupposostenibile.it/2020/asvis-live-21-maggio/>). Ai 28 di Mai, la discussion e fronterâ lis trasformazions necessariis tai modei organizatîfs, des aziendis e dal ambit macroeconomic. L'ultime convigne, ai 4 di Jugn, e procurarâ di mostrâ lis stradis par lâ «Verso una ripresa trasformativa all'insegna della resilienza e della sostenibilità». In specialitât, si cirarâ di rifleti su la necessitât di protezi l'ambient, cemût ch'è je marcade de «Agjende 2030» e te «Ecologie integrâl» da l'encicliche «Laudato si'».

Mario Zili

Maian. Cul proget «Jessi furlans e vè une lenghe», la comiche furlane-lucane e je jentrade inte classe 1e B de scuele medie «Andervolti»

Videolezion in marilenghe cun Catine

Si è presentade tant che la professoressa Marta Ciaccola de Academie de blave di Mortean, e e à tignût une videolezion par furlan sui verps «jessi» e «vè». Cussî Caterina Tomasulo, in art Catine, a sorprese, joibe ai 14 di Mai e je jentrade tant che esperte di lenghe furlane inte classe virtuel de 1e B de Scuele medie «L. Andervolti» di Maian, che e fâs part dal Istitût comprensif di Maian e Forgjarie direzût di Stefano Stefan. E je stade invidade des insegnantis Mariagrazia Molaro e Alessandra Pagnutti, inte suaze dal proget «Jessi furlans e vè une lenghe», che a àn ideât propit lôr dôs. Colegade su la plateforme Zoom, cul so stîl vivarôs, la professoressa Ciaccola-Catine e à contât a 24 arlêfs – midiant di une schirie di esemplis simpatics – la capacitât dal furlan di «acetâ» intal so lessic dutis

lis lenghis dal mont: dal inglês al spagnûl e al arap, dal cinês al francês, dal todesc ae lenghe dai indians di Americhe. «O sin braurôs di vè ducj chescj popui inte nestre lenghe», e à rimarcât Catine. Grant finâl cu la comiche di orijin lucane che e à proponût une cjançon – acompagnade di une base rap (anzit, «trap») – cul test dut par furlan, discjadenant il batimans de 1e B. Classe che, su invît des insegnantis Molaro e Pagnutti, e à dopo elaborât un test su la esperience vivude. «Mai plui o varessin pensât che e fos une lezion tant biele e divertente», a àn scrit tra l'altri, zontant «Nô fruts si sin divertits un vore, parcè che la professoressa e veve un estri simpatic». In sumis, obietif cjapât ad implen!
«Il desiderî – a àn evidenziât di fat lis insegnantis – al è stât chel di dâur ai arlêfs



un moment di ligrie in chest moment tant difcil par ducj. E, in graciis de abilitât e de sensibilitât di Catine, la lezion di furlan e je stade ancje la ocasion par rifleti sul valôr de integrazion».

Monika Pascolo